

# INCINERACION DE ACEITES USADOS, ASUNTO DE 'PROTECCION AMBIENTAL'

por Manuel Soto

'La Comisión Gallega de Medio Ambiente' formulou a declaración de Efectos Ambientais (acordo 2 de xuño 1992) de dous proxectos de "Xestión de aceites usados" promovidos pola empresa PROTECCION AMBIENTAL S.L. Desta forma, o máximo órgano ambiental, como gostan de chamar-se, da o seu visto e prace ao negocio que CERAMICAS CAMPO vai realizar xogando coa incineración de aceites usados baixo o nome de PROTECCION AMBIENTAL. Xogando tamén coa saúde da povoación e da flora e fauna de zonas de grande importancia ecoloxica.

Os proxectos consisten na recollida e queima dos aceites nos fornos de duas fábricas de cerámicas, situada unha en Vilalonga (Sanxenxo) e outra en Lendo (Laracha). Dá-se a casualidade de que ambas fábricas están ubicadas en zonas de especial importancia ecoloxica. A primeira, en pleno complexo Intermareal Umia-O Grove, incluído no convénio Internacional RANSAR como zona de Especial Protección para as Aves (segundo unha Directiva da CEE). A grande importancia ecoloxica da sua avifauna radica nas mais de 196 especies, das que 155 son especies protexidas. A segunda das fábricas situa-se nas immediacións das marismas de Baldaio.

O Colectivo Ecoloxista do Salnés (O Grove) e o grupo Taraio (Carballlo) apresentaron no seu momento alegacións de tipo ecoloxico a estes proxectos. A Comisión Galega de Medio Ambiente informa favoravel-

mente o proxecto de Protección Ambiental, desvotando as alegacións de carácter ambiental por non consideralas suficientes para modificá-lo.

## ALTA CONTAMINACION ATMOSFERICA E RESIDUOS TOXICOS.

Entre as alternativas existentes para o tratamento dos aceites usados, a lexislación española contempla en primeiro lugar a rexeneración, e en último caso a combustión, limitada únicamente a aqueles aceites que non superen os 50 ppm de PCBs e PCTs (bifenilos e trifenilos policlorados, tratando-se de substancias cancerígenas). Os aceites de locomoción conteñen unha media de 20 ppm. mentres que os industriais atinxen os 957 ppm. Porén, a Xunta pretende enviar a estas plantas non só os aceites xenerados en talleres de autos (7500 toneladas anuais), senon tamén os aceites producidos polas industrias (1500 tn) e barcos (1500 tn).

A declaración de efectos ambientais requiere a realización de análises 'in situ' en cada partida, para determinar o contido en PCBs. O elevado número de puntos de recollida e a complexidade das análises a realizar fan pensar que esta medida non se vai a cumplir. Aliás, a Xunta, que aporta unha importante subvención a empresa, deixa en man dela todo o controle das análises que se realicen, incluído o tratamento e interpretación dos resultados. Con elo, a falsificación e o frau-

de teñen as portas abertas.

De todas formas, muitos aspectos permanecen sen resolver mesmo no plano teórico. O controle ambiental previsto non inclue a análise de metais pesados (Cadmio, Niquel, Cromo, Cobre, Vanadio e Chumbo), nem de compostos de cloro e fluor.

Non se realizou estudio de ningún tipo sobre os efeitos da contaminación atmósferica, indicando no proxecto que non se dispón de dados sobre os ventos nestas zonas. A necesidade dun estudio profundo de inmisiones foi desbotada, xa que segundo os promotores, os contaminantes diluiránse nos fumes da fábrica.

Por último, de levarense a cabo os controles correctamente e cumplir a lexislación, este proxecto non resolvería o problema dos aceites usados, xa que non existen instalacións de tratamiento e rexeneración para aqueles aceites que non sexan incinerados. Como ten pensado resolver a Xunta o problema dos aceites con mais de 50 ppm de PCB?. Que vai pasar se a CEE decide rebaixar ese límite de 50 ppm até 20 ppm, como xá ocorre en algúns países?

Algúns tecnócratas teñen presumido de que a Xunta ten resolto estes problemas, ao contrario doutros governos autonómicos. O que averia que afirmar é que os tenócratas de paso na Xunta, se deron moitas presas en apontar-se ao negocio da 'Protección Ambiental'. Semella que a conservación da natureza se entende unicamente como un negocio do que sacar tallada.